

SEBUAH bot yang ditahan Jabatan Perikanan kerana melakukan kesalahan di bawah Akta Perikanan dalam operasi di sekitar perairan Langkawi dan Kuala Kedah. - UTUSAN/SHAHIR NOORDIN



Jabatan Perikanan sita bot, hasil tangkapan RM1.9 juta

UM 20/1/2023 MJ : 30

Oleh NUR AMALINA AZMAN
utusannews@mediamulia.com.my

LANGKAWI: Jabatan Perikanan Negeri Kedah bersama Pasukan Polis Marin Wilayah Satu menyita lima bot menangkap ikan bersama hasil tangkapan dengan nilai keseluruhan RM1.9 juta menerusi Program Pengawasan, Kawalan dan Pemantauan (MCS) Akta Perikanan 1985 selama lima hari sejak Ahad lalu.

Pengarah Perikanan negeri, Sukri Deris berkata, tiga bot ditanah di Pulau Langkawi dan dua

lagi berhampiran Kuala Kedah dengan hasil tangkapan ikan kira-kira 1,700 kilogram (kg).

Katanya, semua bot didapati melanggar syarat lesen iaitu menangkap ikan di zon tidak dibenarkan serta menggunakan peralatan yang tidak mengikut spesifikasi ditetapkan.

"Seramai 20 warga asing berusia antara 25 hingga 65 tahun didapati bekerja di atas bot tersebut," katanya pada sidang akbar di Pejabat Perikanan Daerah Langkawi di sini semalam.

Menurutnya, terdapat juga

bot yang ditahan kerana melakukan aktiviti menangkap ikan di sekitar perairan Pulau Payar dan Pulau Segantang yang merupakan Taman Laut Negara.

"Ada juga yang menggunakan pukat bersaiz kurang daripada ukuran ditetapkan," jelasnya.

Sementara itu, beliau memberitahu, pada operasi kali ini, tiada bot yang ditahan disebabkan mengubah suai tangki minyak bagi kegiatan penyeludupan diesel.

Dalam pada itu, Jabatan Perikanan negeri merekodkan 56 kes tangkapan dan rampasan

di sekitar perairan negeri ini sepanjang tahun lalu.

Beliau berkata, sebanyak RM17,800 denda telah dikeluarkan selain tindakan lucut hak hasil tangkapan, peralatan menangkap ikan dan bot menangkap ikan telah dikeluarkan.

Jelasnya, antara kesalahan yang dilakukan vesel ini adalah menangkap ikan di zon yang tidak dibenarkan mengikut lesen bot atau menggunakan peralatan yang dilarang, atau menangkap ikan di kawasan larangan seperti di Taman Laut.